

寶坻縣志

第八冊

藝文下卷之十八

紛綸歲祀播於藝林青箱鏤管久而彌新或振鉅響或標清音
諸體畢具文獻是尋洋洋八耳悠悠我心志藝文下

紀載

甚哉舊志之疎也諸卷皆闕惟藝文差詳即藝文如奏疏表銘
類亦多闕惟記差詳雖然賴有此耳他無所考就記考之因此
証志中之矛盾者不少矣故余於舊志更定凡什之七八獨於
諸記雖文未甚工亦刪潤而存焉至近代作者斐然博搜約取
異曲同工豈後文之較勝於前歟亦愈知曩者所見之尚未廣

也

寶坻縣記

零參目下
舊聞節本

金鹽使司

劉晞顏

神都全有禹貢冀州之域星文箕尾之分虞舜時為幽州夏商
省幽併冀周初復為幽州召公分土為燕國秦始皇并天下制
三十六郡以幽州土宇為上谷郡歷漢魏下至隋唐以來武為
燕國或為廣陽國或為涿郡或為范陽郡都國廢置更易不常
唐末劉仁恭帥燕為其子守光所囚據其地僭稱燕因置蘆臺
軍於海口鎮以備滄州後唐莊宗命其大將周德威破燕軍於
平岡復收蘆臺軍同光中以趙德鈞鎮其地十餘年間興利除

害人共賴之遂因蘆臺鹵地置鹽場又舟行運鹽東去東國一
百八十里相其地高阜平濶因置椎鹽院謂之新倉以貯鹽復
開渠運漕鹽貿於瀛莫間上下資其利遂致饒衍贍於一方清
泰三年晉祖起於并汾以遼主有援立之勞因父事之以山前
後燕薊等一十六州遺遼遂改燕京因置新倉鎮廣椎鹽以補
用度爾後居民稍聚漸成井肆遂於武清北鄙孫村度地之宜
分武清鄆縣三河之民置香河縣仍以新倉鎮隸焉皇朝奄有
天下混一四海天德間建議令盡以遼宋故地合為一家會寧
興王之地朝廷在焉而尤遼東偏凡在經畧之內地則遠近不

一事則繁簡不同乃詔建都於燕京於時畿內重地新倉鎮頗為稱首直以權院自趙德鈞叛始以來歷運室造及本朝二百年間綿綿不絕每歲所出利源源不竭以補國用故也主上中興撥亂反正思補正隆殘弊每以調度完懷以權鹽課利浩大其司鹽者嘗以散官雖秩至幾於三品咸以流外當之迺命有司改權鹽院署置使司陞為五品設副使之官儻從俸秩視諸刺郡以重其事於時居人市易井肆連絡闐闐雜沓翁伯濁質張李之家皆以世業底富加之河渠運漕通於海嶠篙師舟子鼓楫揚帆慙慙有無泛歷海岱青兗之間雖數百千里之遠微

便風亦不浹旬日而可至其捫瑤瑁嘴鷗之徒若豫且網龜交
甫解佩者比至有不耕穫不畲畲者其稻梁黍稷蟹魚鰕鮓不
可勝食也而河渠左界潞水右纏路曲蘄此名山無不委曲而
貫通之雖斧斤不入山林而材木亦不可勝用也其富商大賈
貨置叢繁既遷既引隱隱展展鱗萃鳥集鬻者兼贏求者不匱
大率資魚鹽之利其人烟風物富庶與夫衣食之原其易如此
而勢均州郡雖古名縣不是過也人情揆之不列縣治殆為失
稱大定十有一載辛卯冬至郊天後鑾輿東巡幸於是邦歷覽
之餘顧謂侍臣此新倉鎮人烟繁庶可改為縣第志之明年有

司承命析香河東偏鄉閭萬五千家為縣以榷鹽歲入國用方之天下及至十一謂鹽乃國之寶取如坻如京之義命之曰寶坻列為上縣著於版籍是歲春季天官為除令丞簿以典其事於時坊廓民居千有餘家自餘村閭著為四鄉東曰海濱南曰廣川西曰望都北曰渠陽其坊正里正胥史應兼從人數列同上縣粵有縣令振威將軍王挺來尹是邑縣丞忠武校尉李愿主簿儒林郎李拱昌縣尉昭信校尉孫告中叅豫連判以備其職先是新倉鎮榷鹽處其西其東則水濟務有承鹽之號亦別更為使司與榷鹽對峙而角逆規規然犬牙為強弱每歲地宜

第其課績增損以殊殿最朝廷病其乖戾不一因校讐利害得
以永鹽所入處之故迨三年癸巳遂省併永鹽於權為一司歲
入課利通計一百三十餘貫仍署為寶坻鹽使司於時縣治尚
百凡草創未有公廨縣僚乃相地之宜於渠水之南大覺招提
之西卜為縣廨招提之東縣丞主簿公署次之又於縣北郭郭
之外卜尉廳焉其所經費仍具辭牒聞於地官皆請給之方營
建間吏民鼓舞莫不予來人百其勤賁有餘力而樂為之用不
一二年間令丞簿公廨皆以即叙其廳舍廊廡高弘壯麗具有
可觀自餘畿內諸廨無出其右者時里中豪右嘗欲磨石以刻

其事迭來懇求為文於予至於義不可辭非欲文其事以紀其實焉

重修孔子廟記

元雷州路經歷

鄭惠

孔子之道垂憲萬世所以綱常立而彝倫叙仁義興而風俗淳此萬世不易之道也微夫子則往聖之道無以明後世之學無以法萬物豈能昌天地豈能位乎而備王者之服享天地之祀宜矣暨我朝世祖有國以來興崇學校作養人才路府州縣莫不有廟建學立師奉俎豆掌教訓罔不嚴恪猗歟盛哉京師之東僅一百里有寶坻縣漢為泉州金改新倉鎮後置瀛州尋更

曰寶坻國朝因之縣艮方一里許有孔子廟歲久圯壞至正十年秋黑廝彥明由懷慶錄事判官來監是邑蒞政之初首謁夫子廟周眎殿宇慨然欲新之具材計功禮義之家同為興築以教諭毛柔克董其事縣尹曹居仁主簿耿德昭郭伯顏不花縣尉課不花典史張希恭相繼而至同寅和協共成其事各捐已俸五百緡以庸工作重修大成殿講堂齋舍剏建東西兩廡十六楹樹以神門匝以修垣經始於至正十一年夏四月落成於十二年秋七月雄遠偉麗金碧輝映觀者咸謂前所未有於是吏民悉遣其子弟入學絃誦琅然揖遜進退文風大振請為之

實地集記
卷之十八
記故紀其事而繫之辭曰

凡厥生民情欲交蔽不約於中天理斯昧匪教弗迪匪學弗成
孔聖之道日月昭明寶坻有廟遇茲建邑百廢俱興同寅協力
門廡敝建殿宇重修神像巍巍綏珮垂旒於廟之北翼翼講室
以還以弘生徒秩秩秩生徒心乎聖謨欣逢聖世柄世文儒
章甫玄端爰懷經術修齊治平當以自立致君堯舜澤流八荒
億萬斯年國運同昌

射圃亭記

明邑令
何文信

皇明受命稽古定制以天下郡縣學校設射圃倣周禮六藝之

教也洪武七年冬文信承乏寶坻因謁學宮雖絃誦有聲而射
圃有缺乃與邑丞程彥名氏謀於訓導滕維白信即學宮之右
闢地為圃以耆宿王思恭于源董其役畧基址議遠邇地纔三
十步不可以射源與邑人王原王守道各捐地而增廣之內構
亭三間周繚以垣縱七十五步橫一十四步經始于去年十二
月乙卯落成於今年二月壬辰乃率僚屬集訓導耆宿於亭召
諸生而告之曰學校之政必先於教養教養之法必先於德藝
藝有六射所以觀德也古者男子之生桑弧蓬矢以射四方諸
侯歲獻貢士於天子天子試之於射宮是古者自生以射為禮

成童以射為教成材以射為貢豈弟子之可忽耶三代而下後
漢行之於永平晉行於咸康唐行於武德貞觀開元自是射禮
不復行矣天朝混一四海臨制萬方以數百年之曠典舉而行
之學校以射而育才科舉以射而取士殆將流轍漢唐而復三
代之規是以設射圃也進退周旋必中於禮直已正志然後能
中故曰射以觀德異日貢於天子之庭為國家有用之材無負
於設圃習射之意云

新開運河記

節本

明大學士

李賢

鄒人

洪惟我朝奠安海宇康濟蒼生而防邊一事尤加周密其東北

一帶控弦之士無慮十數萬人而糧餉之需大抵取給於江淮
是以大河諸衛歲運三百六十餘艘直抵薊州為倉而貯之以
便支用往時由直沽循海道備歷艱險不免踈虞蓋近海多風
船至海濱不敢遽行必淹及旬日甚至彌月候風色止息方敢
一過或至中流忽遇風濤迅作遂罹漂蕩覆溺之患歲損船不
下數十而糧斛動以萬計主漕運者恒以為憂天順改元一新
政令天下臣民莫不忻忭鼓舞興起事功而巡守薊州諸君深
慮此患詢及父老熟於地理者云海濱有二沽一名水套一名
新開沽相去纔十里可以開河通潮以便運艘以避海難於是

具陳其事上命鎮守總兵都督僉事宗勝董其事勝尋嬰恙復
命右叅將都指揮僉事馬榮代之又以監察御史李敏工部主
事李尚共蒞其事三人者才識俱優迺同心協謀相度高下起
薊州諸衛寶坻等處軍夫萬人撫恤獎勵罔有不至以故衆役
感悅爭先效力於是歲三月始事於甲午訖功於丙午人皆驚
異以為成功之速如此必有神明默相其間者遂建天妃宮於
新河之左僉謂斯舉便國家之漕運通商旅之貨殖公私之利
實非小補迺立石於旁走書京師乞予言以紀其事予嘗考唐
神龍中於漁陽開平遠渠傍海穿漕以避海難當時使之於今

不泯諸君是舉端有合於前人之所見矣安得而不書獨是興利難保利尤難後之君子苟慕義者視此刻文庶幾興起繼修之志用保此利於無窮是又廣推立碑之餘意以為來者勸云

新建拱都城圖記

明邑令 莊

釋武進人

城高二丈六尺周一千二十八丈又厚與高等池濶倍之四城各立一門高丈五以磚圍之門厚五寸以鐵裹之東海濱南廣川西望都北渠陽蓋因四鄉而命名也四門各覆以樓上三楹下倍其二高三丈廣加其半東觀瀾南迎薰西拱恩北威遠蓋因四門而取義也水關二索木為樁六十餘根磚石為圍高廣

各丈五入深七尺設柵啟閉北曰開源南曰節流減水洞以鐵為樞礮石為圈容三丈許深七尺角樓四上一楹下三楹高廣如門樓之制東北為挹青東南為環碧西南為廣豐西北為樂治弟橋四上架木下壘石深廣如水關之制名與門同鋪舍四面共一十二所是役也凡用夫役一萬三千餘名工匠四百餘名磚五百餘萬石腳三十餘丈石灰三萬餘石木植三十餘根瓦七萬餘片生熟鐵一萬餘觔釘一千五百餘觔勸義民納冠帶銀一千零五十兩支領工匠食米三百一十一石五斗一升餘悉措置豫備於是度地分工民樂趨事所以八日而土城立